

9 Ahdahwangebun mahween oowh nahmahquewin nebawah tahge enahjegegahda, chege menindwahbun dush nah egewh kademahgezezig.

10 Ahpe dush nasedootung owh Jesus oowh ooge enon, Wagoonan ewh wainje megooshkahjeaig owh equa? oonesheshin sah ween, ewh kaltootahwid.

11 Kahgenig mah ween ketahyahwahwog egewh kademahgezezig; neen dush ween kahween kahgenig ketahyahweseem.

12 Ewh sah kezegenung oowh nahmahquewin emah neyahwing, cheahshegahdaig sah ewh neyowh keonje ezhehega.

13 Quiyuk sahkedenenim, Tebeedoog katahzhewahweenjegaldagwain oowh Menwahjemoowin oomongezho anegooquahkahmegog kiya sah oowh kahzhehegaid wowh equa tahwahweenjegahda, wekah dush chowahnane-mahsewind.

14 ¶ Pazhig dush egewh medahsweh ahse neenzh, owh Judas Iscariot azhenekahzood, ooge ezhalnun enewh keche-zahzahgewejegawenenewun.

15 Oowh dush keenod, Wagoonain kameenzheyaig, pahgedenahmoonahgoog owh? Nesemedahnah tahwahbik dush menik enewh shooneyaun ooge enahwaun.

16 Me dush ewh ahpe kemahjee undahwaindung ewh chepahtahod.

17 ¶ Ahpe dush mahyahjee wekoonding ewh waimbejeshikewahgesenzenoog pahquazhegun, egewh kekenoahmahgunug oogebe ezhalnahwaun enewh Jesus, oowh keenahwod, Adneenden kedemaindum katahzhewahween oowh ewh kebekoosa wekoondewin chemejeyun?

18 Ooge enon dush, Ezhahyook sah owi eneneh emah oodanong, oowh dush enik, Kekenoahmahgaweneneh ekedooh, pashoo peahyahwahgud ewh cheahwahquahgooyaun; ningahahyaun sah ewh kebekoosa wekoondewin emah kewegewahming, chewedoopalmahgwah egewh ningekenooahmahgunug.

19 Keezhehegawug dush egewh kekenoahmahgunug ewh kahgoowod enewh Jesus: kezhah dush kewahwazhetoowod ewh kebekoosa wekoondewin.

20 Ahzhewah dush kahdebikuk, ooge wedahbemon enewh medahsweh ahzhewah neenzh.

21 Magwah dush tahzhe senewod, oowh keekedooh, Quiyuk sah kedenenim, Pazhig kenahwah. ningahbahtahig.

22 Ahpeche dush kenahnenahwaindahmoog, aindahchewod dush oowh ooge enahwaun, Lord Neen nah?

23 Ooge kahnoonon dush, oowh keenod, Owah sah wauj-gwahbahmahwid emah oonahgahming, me sah owah kapahlahid.

24 Tahneezhewabezeh sah owah eneneh Oogwesun ewh azhebeoond: kahwahnesahgezeh dush ween goo owah eneneh pahyahwahod enewh eneneh Oogwesun! tahge ooneshesheneneh owah eneneh wekah negeseoobun.

25 Kiya ween dush owah Judas kahpahtahid, ooge kahnoonon, oowh keenod, Kekenoahmahgaweneneh, Neen nah? Oowh dush ooge enon, Kekeekid sah.

26 ¶ Magwah dush wesenewod, Jesus ooge ootahpenon ewh pahquazhegun, keshahwaindung dush, kiya kepahpahquabedood, kenenod dush enewh kekenoahmahgunug, oowh keekedooh, Ootahpenahmook, mejeyook; me sah oowh neyowh.

27 Kiya dush ooge ootahpenon ewh menequahgun, kemahmooyahwaid dush, ooge menon dush enewh, oowh keekedooh, Aindahcheyaig menequayook ewh;